

新嘉坡風土記





新嘉坡風土記敘

光緒二年丙子六月鍾珏始遊京師因鄉誼識青浦席君  
淦翰伯因翰伯識元和汪君鳳池藥階鳳藻芝房昆仲暨  
漢軍左君秉隆子興藥階以乙亥科舉人供職內翰翰伯  
芝房子興皆外省同文館生學成上貢充總署天文館教  
習時鍾珏寓居崇文門內晨夕過從親若骨肉閱三月束  
裝南歸臨歧握別情各難遣僉謂聚散不常嘉會難再盍  
效世俗通譜之誼以爲他日左券於是翰伯齒最長藥階  
次之子興芝房又次之鍾珏最後蓋衣帶束帛之贈古人  
有不能已者朋友以齒相敘比於兄弟之倫事雖非古其

新嘉坡風土記敘

一

情均也越二年戊寅子興以奉使英法大臣 奏調出洋  
充繙譯官旋任新嘉坡領事壬午芝房舉京兆第二明年  
癸未入詞林翰伯藥階亦已晉級獨鍾珏佗僚如故每以  
青雲難致良朋相見無期用懷愧憤丙戌以優貢北上恭  
應 廷試獲與翰伯藥階芝房重話舊好中酒輒言曰今  
日歡樂不減疇昔顧安得飛身天南復與子興把臂乎八  
月出都家居無繆時動南游之念請於母曰可十二月航  
海至粵先以書達子興約來歲二月赴坡丁亥正月杪至  
香港得母病耗折而歸疾已痊可居一月母將成子之志  
促裝戒行三月中旬重至粵東游澳門旬日四月下旬始



自香港乘輪船南發行九日而至蓋後四月朔也昔張敏與高惠友每相思不得見敏於夢中往尋但行至中途卽迷不知路故沈約詩曰夢中不識路何以慰相思今鍾珪一歲之中南北萬餘里外尋舊盟敦夙好十年之思一旦盡慰以視張敏其樂何如蓋夢虛境也游實跡也虛者之不若實天下事大抵然矣旣與子興見下榻公署談論不輟如班尹之永夕並乘遨遊如郭李之同舟視昨歲京中與翰伯諸子歡樂不更有加耶居卅月雜記風土若干則錄而存之以誌鴻爪敘其緣起如此亦以見斯游之非偶焉爾上海李鍾珪



新嘉坡風土記



自暹羅直南伸如舌長如股中有山如脊斗入於海皆巫  
來由種人居之西人統名之曰下暹羅其國有十山西曰  
吉德曰沙刺我山東曰斜仔曰大坤曰宋卡曰大年曰吉  
連丹曰丁噶奴曰彭亨曰柔佛地至柔佛盡處嶺嶺一水  
隔二三里而得一島西以蘇門答臘爲蔽南以爪亞爲屏  
東以婆羅洲爲障四面環水如驪龍領下珠卽英人所謂  
新嘉坡也舊名息力又稱呷叻華人或稱新州府其地南  
距赤道一度有差

自香港乘輪船指西南行計程三千四百七十七里至越

新嘉坡風土記

一

南之西貢自西貢指南偏西行二千四百二十一里至新  
嘉坡風利五六日可達風逆或至七八日如灣泊瓊州西  
貢各口又需時日

攷之古冊斜仔以下皆頓遜地其後析爲列國而柔佛處  
極南叻地屬焉然百年前榛莽未啟一荒島耳華人之懋  
遷南洋者旣乏間津卽歐洲諸邦如荷蘭如葡萄牙身爭據  
羣島亦未厝意及此嘉慶二十三年英人名士淡不公者  
始得之以爲海道四達之區上於政府伐木開道遂設商  
埠是爲開闢新嘉坡之祖西人嘗鑄銅像以誌勿謾

全坡之地南北十四英里得中國四十六里有差東西二



十七英里得中國八十九里有差中有河自東達西劃分南北居人名其北曰小坡南曰大坡

蘇門答臘爪亞婆羅洲三島遙爲屏蔽皆在數百里及千餘里外對坡一島綿亘東西東曰廖嶼西曰吉德門天然近障也吉德十餘小島若斷若續直與坡接窄處不過數丈寬處不及一里輪船自西南來者從此入其東自柔佛之羅漢嶼如髻如拳錯列海中下有礁石舟不能近論其形勢兜裏層層南洋各島皆不能及

海口炮台西南二座俱在山顛最得形勢其東一座在羅漢嶼西二十里柳林中平地高四五尺台面細草茸茸自

### 新嘉坡風土記

二

海中望倉卒不可辨識是處海面不及三里

居民冊籍約分五種曰中國曰歐羅巴統英法俄德各國曰巫來由統南洋各島國曰亞墨利加統南北花旗各國曰東方諸國統五印度以上諸小國及緬甸暹羅等國五種人數以中國爲最多其次巫來由

華人住坡戶口最難詳塙查光緒七年英人所刊戶口冊云福建男女二萬四千九百八十一人廣州一萬四千八百五十三人潮州二萬二千六百四十四人嘉應州六千一百七十七人瓊州八千三百九十人三州府生長之華人九千五百二十七人三州府者新嘉坡及檳榔嶼麻六甲



三處也不列籍之華人二百七十二名統計八萬六千六十六人近五六年來雖少有參差總在八九萬之間而歷來居叻游叻者動稱十餘萬皆約畧之詞雖西人所報未必盡塙不列籍者不止此數然總不過十萬人

巫來由人通謂之士人有書作穆拉油者閩廣人讀無爲莫故巫亦讀穆其自印度一帶來者謂之吉靈人又有波斯一帶者謂之齊智人土人有黑有白吉靈齊智俱膚黝如墨其以布蔽下體不衫不袴三種人大畧相同

巫來由柔佛國王都城在坡北岸一衣帶水相望可接坡中有行宮時往來其間其民之在坡者皆貧無生計西人役以工作幾若牛馬華人亦有用之服役者

新嘉坡風土記

三

叻西北三百餘里柔佛之上沙刺我之下有埠曰麻六甲本暹羅屬國葡萄與荷嘗迭據之道光初歸於英麻六甲西北九百里海中有島曰檳榔嶼亦屬英兩處華人共十餘萬英設總督於叻統轄三埠

駐叻英官總督而下曰輔政使司曰按察司曰參政司曰正副經歷司曰戶口司曰庫務司曰地理司曰營造司曰巡理府曰護衛司曰船頭官巡理有三堂分理坡中各案件畧別大小輕重護司專管華人一切事名爲護衛華人實則事事與華人爲難



英國駐叻軍額計英炮手一隊二百四十八人外兵總六員修理軍械匠十八人步兵一隊八百九十三人又印度炮隊并修理軍械匠共二百七十五人管理炮隊糧道官二員炮隊繪師一名營醫十四名統共一千三百五十七人較香港少三百五十七人其水師兵船則游泊無定云兵房二處一在升旗山一在公家花園對面山坡上平時不見一人逢操演齊出至臨海拋球場中

各國駐坡領事中國而外曰美曰德曰俄曰法曰奧曰意大利曰丹曰荷蘭曰葡萄牙曰西班牙曰巴西曰比利時曰哈華亞曰暹羅曰瑞典那威二國并一領事共十有六

### 新嘉坡風土記

#### 四

中國領事之設始於光緒三年郭侍郎使西過叻體察情形 奏請設南洋總領事兼新嘉坡領事官經總署議以總領事事宜姑緩籌辦准設新嘉坡領事一員隨員一員初設領事時議以華人戶口年貌身格費及船牌費抵俸薪各項後戶口身格費未行船牌費不足抵用光緒五年始定仿照出使美國日本章程領事隨員俸薪由出使經費內支給而船牌費仍收取抵用查船牌費每重一噸收洋四占半合銀三分有奇此項歲入不過數百金僅抵一月經費而船戶涉險犯難獲利無多似當議除以示體卹泰西各國凡屬通商埠頭他國領事不預聽斷之權乃洋



人在中國不然如上海租界所設公廨華洋會審已非西例西官又好攬事權必欲華官仰其鼻息志士憤焉駐叻各國領事概從西例不預審斷而華人生聚既繁事端日出亦有領事可辦之件皆爲護衛司侵奪動多掣肘故給發船牌外惟勸興義學講 聖諭開文會以行教化而已居民犯事統歸巡理府審斷輕者判罰重者監禁監在西南山坡上周以垣墉巡差負槍晝夜邏察查西厯上年底止獄中重罪經臬司判禁一年以上者華人共存四百八十三名巫來由人七十五名吉靈人四十三名其所犯輕罪經巡理府判以罰款或不能完繳以監禁抵銷者一年

新嘉坡風土記

五

之中華人入監共二千八百九十八人此中期滿出獄者二千六百七十九人入獄後具贖出者一百五人巫來由人一年共入一百九十七人吉靈共入一百八十八人獄中寬廠潔淨每犯日食兩殮葷素菜各一肴雖曰拘禁實則徜徉自在勝於在外作苦故犯事人往往不願納鍰甘於住獄近西官察知其弊議裁葷菜云

叻自開埠以來進出口各項貨物一概免稅惟烟酒重征由華商設立公司包納烟公司月包稅八萬六千元酒公司二萬一千元二項爲入款大宗地租估屋值十取一其他抽捐名目尙多惟皆不苛取



西人每至年終預將來歲一年進出款目核議登諸日報是亦量入爲出之道查本年叻中進款應有三百六十七萬元出款三百六十三萬五千四百四十四元舉此可得歷年進出款大畧 又按檳榔嶼上年入賦稅一百二十一萬六千六百八十八元支款九十七萬七千五百二十九元計餘存二十三萬九千一百五十九元 坡中用錢不用銀用洋錢不用中國制錢自一鏰至一元凡四等最小爲鏰合制錢二文五六毫四鏰爲一占又名先士十占爲一毫十毫爲一元毫與元以銀爲之鏰與占以紅銅爲之

新嘉坡風土記

六

通用之一元洋錢鑄自日本輕重與鷹圓同鷹圓光者可用然甚少其一二毫之小洋錢皆倫敦及香港所鑄占鏰銅餅則港與坡並鑄之

叻地商務以胡椒甘蜜爲大宗歲必售銷數千萬元然皆出自他島叻蓋聚貨不產貨者也叻所出者惟榴連檳榔椰實波羅杞果山竹波羅蜜甘蔗洋桃香蕉生姜等果食有人參果者形如龍眼味若鷄心柿名最稱美品

胡椒始種於印度之錫蘭運往歐洲西人以製油佐食旣而蘇門答臘亦種之今則南洋大小各島無不種植而運售皆在叻地商人設公局以主之



甘蜜樹高與人齊其葉長三寸兩端銳中寬寸餘採而搗之其漿成蜜甘與蜂蜜相埒歐洲各藥中多用之銷行甚廣與胡椒二項同一公局主其事者由華商公舉經柔佛國王諭充

自柔佛以上各國港口繁多俱產椒蜜華人之散處各港者實數十萬大都占地爲園雇工種樹名曰園主每一港推一園之最大者爲港主叻中富商設號各港以收椒蜜如中國花米絲茶等項坐莊者然

潮商多業椒蜜閩商以各項海貨及往來各埠之輪船爲宗資本俱鉅他商不能及

新嘉坡風土記

七

各貨價目漲落不定擇其大者記之以備留心商務者參攷烏椒每担二十一元白椒四十一元甘蜜四等自十一元至六元上甲錫每担三十八元乳紅白十有四種自九十元至十七元牛皮八種自十七元至十元籐七種自七元至三元柳肉六種自四元至三元犀角三等每斤自四十元至二十六元魚脂每担一百二十元白魚翅三等每担一百十元至四十三元烏魚翅三等三十九元至十五元海參二十餘種自六十元至四五元玳瑁七等自一百元至一百六十元白燕每斤十七八元毛燕上每担三百二十元毛燕中一百八十元其他雜貨不載



叻中華人最多亦最富有擁貲稱千萬者有數百萬者若十萬八萬之戶但云小康不足齒於富人也然究其發跡多在三四十年前近則鮮有驟富者矣

土人最貧吉靈人亦鮮充裕惟齊智及阿刺伯人不少殷實齊智人專以放債爲生重利盤剝如中國印子錢之類華商資本缺乏或向告貸一時濟急久則剝膚時有涉訟不了者

居民生死每月有冊刊報查西歷二月冊載居民生育男女一百五十七死三百五十三月生二百一死五百十六四月生二百十五死五百二十五五月生一百九十五死

新嘉坡風土記

八

五百三十二觀此亦可參知民數矣

生死報冊俱有限生育者二十一日內不報查出罰洋五死者逾一晝夜不報卽議重罰蓋恐有別故隱匿故特重其罰也

在坡生長之華人一經報冊卽隸英籍其質性良者恒諱而不言桀者且以自大入耶穌教者尤甚竟有父子不相能如陌路者風俗人心之壞不待言已

年來賑捐防捐富商樂輸巨款核獎得虛銜封典者比比其門前榜大夫第中憲第朝議第一如內地至頂戴冠服則惟歲首及婚嫁用之尋常酬應往來或穿單長衣一領



已不多覯居恒短衣跣足坦率習慣冠履忽華忽洋出門必戴帽或洋帽或巫來由人帽其式如僧帽戴中國小帽者甚少惟御長衣必戴小帽雖盛熱不露頂亦風俗使然也

閩人髮辮俱用紅線爲絡雖老不改亦其風俗使然故見紅辮者望而知漳泉二府人也

土人所操巫來由語通行南洋各島華人久居坡中及在坡生長者無不習之又多習英語同儕往來時而巫語時而英語時而閩廣土語他省初到人往往對如木偶

久居叻地之華人多娶土人女爲室其裝飾與安南女子畧同窄袖寬衣其長沒足因而所生之女亦從土裝閩閩人潮人家中竟無一漢裝婦女者不若男子尙有一辮存其本眞也

新嘉坡風土記

九

閩粵士子在叻授徒者頗不乏人叻中子弟讀書回籍考試者亦不少然叻地無書又無明師友切磋琢磨大都專務制藝而所習亦非上中乘文字近年領事官倡立文社制藝外兼課策論稍稍有文風矣

地近赤道有熱無寒然熱不過八十度廣廈深居時有涼風習習此候擬之江南在梅子黃時枇杷熟後惟日中行路則杲杲之勢甚於內地炎歊彼工作負販挽車輩日必



沖涼數次或有身塗土人所製黑油以避烈日者幸時晴時雨且多樹木故少觸熱路斃之人

沖涼之法自首至足以水噴濯如醍醐灌頂透入心中立解煩熱久居此地者日必一二次亦習慣使然非是不適初到者往往不敢輕試然當日中行路後亦不可不一沖也

坡中時有風而無颶風時有雨而無淫雨卯初日出酉未日入終歲不改日中則熱夜分則涼四時皆然居民單衣一領若將終身故甚利窮人

西人之記晴雨者云近歲最多雨之年共一百四十日最少之年一百十二日然晴雨甚調五日中三日晴兩日雨從無久旱不雨一雨經旬者

新嘉坡風土記

十

叻地一年內有元旦三華人俱遵華歷元旦一定者也西人遵西歷無定而有定者也若巫來由人元旦則有定而實無定聞其將近元旦之前數日夜半彼教中牧師登高處望日出見天際一線日光出地卽欣然曰明日元旦矣於是集衆教堂中立誓以爲實見日出每年元旦在中國六月初設遇風雨連朝陰晦無日有遲至中旬者今年中歷有閏故五月初二日爲其元旦是日乘車賀年亦紛紛不絕於道



坡中平陽多而山少山亦不高惟居全坡適中之一山高五十餘丈英總督署卽建其上輪船入口首先望見此爲最高他如大小坡分界處之王家山及迄西瀕海一帶諸山俱高不過十餘丈王家山有石磴可登磴止三十餘級輪船入口王家山及迤西一山俱升旗幟以報各商瞻其旗號可識何國何行何船從何處來二山因俱名升旗山兩升旗山俱有砲台王家山每日十二點鐘放炮一響以準鐘表禮拜日改一點鐘放黎明五點鐘黃昏九點鐘各放炮一響以定晝夜

凡遇火警傳電至王家山卽放炮放火箭日則懸旂夜則

新嘉坡風土記

七

懸燈炮之響數箭與旂燈之顏色分出地段使人一望而知救火車聞炮卽出沿途皆有水門澆灌甚便故無大火坡中廟宇寥寥會館亦少宏壯而教堂林立有天主耶穌天方各教之別若大若小或崇或俾不下二十餘處

市廛繁盛莫若大坡洋行銀行書信館海關均在大坡海濱小坡雖有市集皆土人所設土貨及各項食物無一巨肆其迤北一帶多園林樹木境最幽靜有地名牛車水者在大坡中酒樓戲園妓寮畢集人最稠密藏垢納汙莫此爲甚

煤氣燈徹夜不熄各舖戶門首俱懸神燈初二十六之夜



家家燈火至九點鐘方熄

牛車水一帶妓館櫛比聞注籍於護衛司之妓女共有三千數百人而此外之私娼女伶尚不計其數皆廣州府人或自幼販賣出洋或在坡生長者

頻年香港販幼女來坡賣入妓院者踵相接領事憫之率同華商紳言於英總督總督允下護衛司議章保護設保良局以時查察於是此風少息

戲園有男班女班大坡共四五處小坡一二處皆演粵劇間有演閩劇潮劇者惟彼鄉人往觀之戲價最賤每人不過三四占合銀二三分並無兩等價目

新嘉坡風土記

三

叻中酒樓無多廣菜番菜各一二次凡宴客在各家園林者多菜兼中西酒飲白蘭地威四稱香賓等番釀飲粵東糯米等酒者已少紹興酒則如瓊漿玉液矣

客寓亦寥寥無多不如香港粵垣上海遠甚輪船到埠亦無接客之人必須自雇小艇運行李至岸另喚腳夫或雇馬車裝載然腳夫多閩人馬夫多土人言語不通易受需索故孤客遠臨極形不便

南洋鴉片烟貴於中國數倍以其稅重也叻中每錢需洋銀二毫聞加拉巴亞齊等處每錢五毫云然吸烟者並不見少且窮人尤多彼拉手車者日夜得一元繳租四毫可



餘六毫苟無烟癖度日有餘乃十人中無烟癮者不得一二  
二炎蒸汗血博得之蠅頭盡入烟斗殊可憐己

英人賭禁綦嚴然叻中賭風甚盛有一局名天師公司專  
誘人賭黨與極多無法禁絕前年有華人上條陳於議政  
局請照荷蘭辦法盡弛禁令重征其餉歲可入數十萬元  
當時頗有韙其議者而輔政司謂英國不能如荷蘭辦法  
致傷政體屏置不議仍求禁絕之法此亦可謂能識大體  
者矣

十年前途中但有馬車載人牛車載物後有東洋手車近  
又有火車雖日並行不害究之火車興而手車牌額截止  
舊者汰而新者不得增往時有四千輛者今不過二千餘  
矣貧民失業無以餬口往往流爲盜賊劫掠搶竊之案層  
見疊出西官不究其源但遇案治之獲犯懲之而已

居民食米來自安南暹羅緬甸每百斤約洋銀三元食物  
中魚最鮮美價亦廉其他豕羊鷄鳧之類均視粵省昂貴  
而菜蔬尤甚

西人於西北山高處尋泉源鑿池蓄水用沙濾清以鐵管  
引至人烟稠密處復於山上鑿池激而上之再用沙濾散  
入支管便民取用居民多通管入屋量出水口門多少取  
值不限用度惟數日不雨則受之以節云



叻地樹木繁盛尤多椰林其次檳榔榴連菩提等樹最多然皆不甚高大欲求一百尺之材十圍之木無有也或曰故多喬柯六十年前西人開山被伐殆盡云

松有孤幹挺特高八九丈者枝葉層層皆圓其下寬二三圍漸上漸小多至數十重其形似塔因名塔松初見疑經翦紮後知自然生成又有扇蕉形似扇其根出地四五尺兩旁各出葉七八瓣排列甚勻遠望宛然一扇此二種皆不多觀

椰實有大如斗者其汁甚清微有酒味土人多食之按南方草木狀云昔林邑王與越王有故怨遣俠客刺得其首懸之於樹俄化爲椰子林邑王憤之命剖之以爲飲器南人至今效之當客刺時越王大醉故其漿猶如酒云嘻其信然耶

新嘉坡風土記

西

叻中向多虎患西官懸捕虎之賞歲有所獲近年開路愈多人烟日密虎斂跡矣然聞西北山深林密處猶有虎穴在

鱷魚形似守宮自首至尾大者長十餘丈自昌黎驅後中國海面罕或見矣而近叻一帶甚多每於夜間游泳傍舟掉尾掠人落海吞噬聞每歲中輒有被其害者

坡中道途寬坦修治之工終年不輟橋梁多以精鐵爲之



較之上海租界各橋更形堅固馬車路四通八達無往不利每於申酉之交馳車騁遊沿海濱以入山內濃陰深樹細草疏花不絕於目時或一谿一橋兩三茅屋或層樓傑閣隱約林間昔人所謂入山陰道應接不暇殆亦似之夕陽將下聞信信喔喔聲恍惚峰泖景象幾忘其置身萬里外也

西人所謂花園與中國異並無樓臺廊榭惟擴地一區多植樹木其中羅列名花奇卉供人清賞豢養珍禽異獸廣人眼界而花徑縱橫亦頗引人入勝坡中之公家花園卽此類也然草多花少有禽無獸尙不如香港之園此外富

新嘉坡風土記

圭

商巨賈購地爲園則畧有樓臺以時宴客亦頗饒幽致叻中無名勝地然一草一木無不向日似笑禽言鳥語盡含歡聲日晡時瀕海遠望帆檣林立中浮巒數疊隱隱送青此景不可多得至如公家花園雖無足觀亦甚幽曠而兩處出水之山一泓清水周以鐵闌旁蒔花草別饒佳趣西國於大小書院外別有博物院所以考平日之耳聞徵諸目見實與書院相輔而行於學問一道大有裨益者也叻中博物院規制甚隘儲物無多然倮之族有巨人全體之骨焉毛之族有虎豹犀象及馬牛種種焉羽之族有射屏之孔雀焉鱗介之族有鱷魚巨鼉焉皆習聞而罕見者



至如獮之類十有餘鷓之類二十有餘蝶之類百有餘鷓鷯綠者正色而或朱或黃或白或黑蝟之毫如刺西人取以爲筆而其形如狼而無尾豕與羊有一首二身者魚之首有如人面者蟒之長有十餘丈者又若各國古衣冠古戰具古錢奇奇怪怪莫殫其數然聞倫敦博物院百倍於此殊興望洋之歎矣

西人醫院之設所以惠濟窮黎非淺其治法有與中國不同者故華人每震駭不敢入然其規制之善固可仿行常見澳門華商所創之鏡湖醫院其中養病所分內症外症瘋症男女各別一切皆如西醫院而醫生則華人爲之仍

新嘉坡風土記

六

用刀圭方藥此仿西人規制而能通其變者宜乎仁壽一方也坡中醫院爲英人所設地寬廣病房潔淨透風人設一榻外又具長棹橈以時食息病者或偃或立或坐或行無拘苦狀因思中國各城邑施醫施藥不乏善政其大都會善堂林立亦有留養病民者然房舍偏仄穢氣薰蒸無病人入之難免生病病者其何能瘳如西醫院不過拓地數畝增屋數楹雇打掃夫數名而惠不大且實乎  
閩廣沿海人民至南洋各島謀生雖已日久然皆貿易之商賈或以負販營生一屢受處卽傭工之輩往時航海而來亦多有依托二十年來西人開墾招工傭值頓貴於是



販賣人口出洋者名曰賣猪仔設館於澳門公然買賣沿海人民或被騙或被劫一人番船如載豚豕西人以賣者賤視之卽亦虐役之其慘有不可言狀者迭經查禁一時稍戢日久網疏此風漸長近來廈門香港每一輪船開行搭客多至千人少亦四五百其中自願出洋者固多被拐者當亦不少去歲竟有拐同母兄及从兄來坡者經粵省大憲訪聞行查遞籍其由領事就地訪確超拔遣回者近歲較多

華人來南洋傭工者抵坡先投客館客館者奸商所設卽猪仔館也客或自備舟資稍有旅費者不致虐視若迫於生計倉卒出洋身無長物一投客館則此身非己有矣固不必被拐而來始落陷阱也在叻華官紳屢欲清其源而爲英官所持卒不得行

新嘉坡風土記

七

中國犯罪之徒皆以南洋爲逋逃藪地方官訪查得確移文領事請提皆以約章未載爲西人所持此例不通關繫政令非小

坡中生齒日繁莠民雜糅結黨立會爭立名目西官迭次嚴禁現存一會名目有五西人統謂之危險會凡入會有册每年報護衛司據報上年新入者六千三百五十人其入會總册共有五萬六千二百餘人誠可云危險矣



叻地開闢伊始西人政尙寬大以廣招徠粵閩人接踵而至  
至貧遷有無日新月異當咸豐初已成巨埠同治間稱極  
盛踵事增華至今日而發洩已極雖邇年商務未遜於前  
而風氣之開多害黠利變詐姦偽情狀百出蓋亦運會將  
轉之機也居斯土者當何如持盈保泰哉

新嘉坡風土記

六